


FASNACHTSGESELLSCHAFT



BASEL ALTI GARDE GEGR. 1995

Fasnacht 2000

Dr Lagg isch ab

Nit alles, wo no geschtert rächt,
isch hitte voremsälber schlächt.
Scho gaar nit mues, was glaschte duet,
grad richtig syy und drum au guet.
Me derf scho noonem Neie strääbe,
sett aber au s Bestandene pflääge.
Denn: Isch dr Lagg emoole ab,
blybt aim numme no d Fusch im Sagg.
Wenn d luegsch, wie dr Kanton will spaare,
kennsch wiirgglig us dr Huut grad faare.
Dr Zschokke-Brunne het me gfunde,
dää dert bim Kunschtmuseum unde,
liess sich aifach, s isch zem Gyggse,
mit Sand gschwind obenaabe wiggse.
Statt oolivbruun wien er sott syy,
luegt er jetz schiessig goldig dryy.
Är funggled bländig - s isch dr Hammer -
ass wäär s e Wienachtsbaum vom Wanner.
Dschuld an däm Moorggs, das lyychtet yy,
ka gwiis nit e Beamte syy.
Denn juscht im Baudep, wo die Fritze
uff waiche Stieli d Zyt absitze,
wird me doch fir Phadynaa
e Gspyyri us Erfaarig haa.
Jetz isch me draa, дәә Brunne z rette,
fir vyyl, vyyl Gäld, doo kasch druff wette.
Zem Himmel stinggt s, dr Laag isch ab,
dr Bürger macht e Fusch im Sagg
und legt sich denn grad us Brodäscht,
in s blocherischi Wäschpinäscht.
Me kunnt ins Stuune wie die Brieder
mit fromme Sprich und Haimedlieder,
mit Fremdehass und Naibaroolle
so vyyl Stimme sinn go hoole.
Rytlichwuur und Willi Däll
vergisst die Bandi aber schnäll.
Wenn s drum goot, e Raibach z mache,
denn, guet Nacht, git s nyt mee z lache.
Jeedi Buude, wo rentiert,
wird ins Ussland transferiert.
Uff dr Streggi blyybe Stelle -
het dr Wäaler daas ächt welle?
Dr Lagg isch ab, au s Mylidäär,
duet sich zer Zyt gaar gryysli schwäär.
Wo miir im Dienscht fir s Vatterland
no stolz sinn gsii uff s griene Gwand,
wie gschwind bisch dert in d Kischte gheit,

isch dr au s Gringschte abverheit.
In Bääm ka soon e Heer Bellaasi -
im Stiil vom Al Capoone gwaasi -
ooni Mie und aifach soo
Mylioone unterschloo.
Kai Angscht, дә Bursch mues kuum derwääge
e Lääbe lang go Gugge glääbe?
Är wird zem Dangg, ass er nit schnuurt,
wenn iberhaupt, bedingt vergnuurt.
Dr Lagg isch ab. No dr Dewyyse:
Jeede Daag e neii Kriise,
duet halt s Volgg, es isch z biduure
immer e bitz mee versuure.
Will uns wiirgglig nyt mee groote,
als die Expoo mit de Doote?
Blybt vo Basel und sym Glanz
numme non e Dootedanz?
Dr Lagg isch uff alli Aarte,
sogaar in unserer Alte Garde.
Dr aint gleent iber beesi Bai,
die anderi het Nierestai.
Und mängge Maa bi uns, den Alte,
ka sy Wasser nimm lang bhalte.
Drum mache d Mugge uff dr Route
e Maarschhalt, alli fimf Minute.
In dr Baiz dnoo git s, heerjee,
statt Wysse numme griene Thee.
Dää darf me eerscht elai no dringge,
wil unseri Jintli sich mien schmingge.
Fir d Wyybli isch halt - ganz extreem -
dr Lagg, wo blettered, e Brobleem.
Miir Mugge wänn nit numme glaage,
sondere au s Guete saage:
Letschthi hänn so gsteerti Gselle
unseri Faasnacht gloone welle.
Dr Uurschrei, vellig biirewaich -
faschtgaar e zwaite Morgestraich -
isch denn aaber bees in d Hoose.
In de Gasse, uff de Stroosse -
in dr ganze Stadt phersee,
het me kuum e Bebbi gsee.
Dr Lagg isch, Baasel frei di drab,
in Sache Faasnacht ganz nit ab.

**D Ladäärne sinn vom Mäntig znacht bis am
Mittwuch demoorge uff em Minschterblatz.**